

# GALESIA

## Pepa Paulo iŋgere panzi kalo-tawana tamâta simo Galesia tâno

Galesia nde tâno tonje Rom ikatona, aku Juda tamâta rârâ simo ŋinde. Paulo muŋga imo Galesia tâno itula pâri ara panzi mbwani rua (Pâri Tamâta 13:51, 18:23), kala kalo-tawana tamâta ŋgu pinde simo ŋinde. Andeta tamâta pinde simâ sipâŋga ku silele pâri ara ipâŋga kie tonje. Kinzi siporo tu mâsi ŋana taponu muli pa ŋgua tukuŋa kâ nde nzâla ŋana tapâŋga ilonda mbâra-mbâra lâ Maro Kindeni nao. Andeta Paulo iŋgere ŋgua ŋine panzi iporo kaika tu ŋana nenda kalo-tawana nâ, ande Maro Kindeni ikai kindi piti lâ kondoma ilo. Nenda vetâŋa ara ikura tu iveta kindi tamo sondu lâ Maro Kindeni nao, ande tia.

---

**1** <sup>1</sup>Naŋa pâri-tamâta Paulo. Kinzi tamâta ŋalaŋala ŋandai sipatea naŋa kala apâŋga pâri-tamâta ŋga, aku tamâta tonje ŋandai io naŋa ŋana alâ atula pâri ara ŋga. Yesu Kirisi aŋga Tama Maro Kindeni, inani kala muŋga ipaŋo Yesu lâ mateŋa nianzi imandi imo via kilo, kinzi rua sipatea naŋa ŋana aveta wurâta ŋine. <sup>2</sup>Naŋa amo taitu kunzi tamâta pinde uru siveta wurâta kuku naŋa, kala aŋgere ŋgua lâ pepa ŋine tini imâ pa miki kalo-tawana tamâta kamo Galesia tâno.

<sup>3</sup>Kindi Tamânda Maro Kindeni aŋga Maro Yesu Kirisi rua nenzi wisi-wisi wa wisi-pisi wa imâ pami. <sup>4</sup>Yesu Kirisi iveta ikura Tamânda Maro Kindeni ne pateâŋa mine, kala ipile tamwata ne via ku imâte ŋana izavaru nenda kiesaka piti lâ tininda. Iveta mine ŋana iyaute kindi piti lâ tâno ŋine ne vetâŋa potomule. <sup>5</sup>Mine nde ara ŋana kindi ma tapanea Maro Kindeni tasuka i ŋa kâki ikura zo zo. Mao.

### Pâri ara taitu nâ ikeno

<sup>6</sup>Opopo, naŋa ilonŋu kura tia ndo ŋana miki nemi vetâŋa kâ! Muŋgani, Maro Kindeni isarâwa pami tu kakai Yesu Kirisi ne wisi-wisi ŋinde.

Andeta miki walele nâ kapu mulimi papa i, aku kamandi nana kapaiapa kuku pâri ara kie tonje. <sup>7</sup>Anga pâri ara ninde nde pâri ara mao, ande tia ndo. Taitu tamâta pinde siveta nana sizavaru ilomi kalomi. Kinzi situ silele Yesu Kiriisi ne pâri ara ninde ipânnga kaŋa tonje. <sup>8</sup>Andeta miki kaloŋo nga; ambo maka warakama tâku samba ne aŋelo tonje tâ ma katula pâri ara pami, andeta pâri ara ninde nandai rege-rege kuku pâri ara ninde maka nanayoni katula pami, ande naŋa ano pa Maro Kindeni tu i ma ikai tamâta iveta mine ku itambira ilâ yââ ŋalae ne mbââ ilo, ma imo ninde ku imo nâ. <sup>9</sup>Maka muŋga kaporo ŋgua ndainani nâ, kala nina naŋa atu aporo ŋgua kaŋa taituni kilo. Tamâta pinde uru situla pâri ara tonje pa miki, andeta pâri ara ninde nandai rege-rege kuku pâri ara ninde muŋga miki kakai lâ. Mine kala naŋa ano pa Maro Kindeni tu i ma itambiranzi tamâta ninde silâ yââ ŋalae ne mbââ ilo, ma simo ninde ku simo nâ.

<sup>10</sup>Naŋa nandai ilongu tu kinzi tamâta ma ilonzi ara pa naŋa nga. Naŋa ilongu tu Maro Kindeni nâ ma ilo ara pa naŋa. Aku naŋa uru aporo ŋgua mâru-mâru panzi tamâta, ande tia. Mao nâ, nia ndoyo naŋa uru aporo ŋgua mâru-mâru panzi tamâta. Andeta kaloŋo nga; ambo vetâŋa ninde ma ikeno pa naŋa yo, ande naŋa ma akura tu amo Yesu Kiriisi ne wurâta tamâta mao, ande tia. Andeta apile vetâŋa ninde marumbu lâ.

### **Paulo parina nana muŋga ipânnga imo pâri-tamâta**

<sup>11</sup>Niŋgu-nambwe wukale, naŋa ilongu tu miki ma kasama ŋgua nina sondo ndo; pâri ara ninde muŋga atula pami, ande tamâta nâ nenzi ŋgua, ande tia. <sup>12</sup>Tamâta tonje nandai itula pâri ara ninde pa naŋa nga, aku tamâta tonje nandai ipanana naŋa nana nga. Yesu Kiriisi tamwata itula pâri ara pa naŋa kala akai lâ.

<sup>13</sup>Miki kaloŋo naŋa parinânngu lâ, nana vetâŋa rârâ muŋga aveta ninde. Miki kasama tu naŋa muŋga apono muli sondo ndo pa Juda nenzi mâsi wa ŋgua tukuŋa rârâni. Aku naŋa akai kazâŋa ŋalae panzi tamâta ninde kalonzi tawana Yesu, aku atogo nana azavarunzi kâ. <sup>14</sup>Naŋa muŋga amandi kaika ndo nana asuka timbuma nenzi vetâŋa rârâni kâki, aku apolenzi nawalânngu Juda tamâta limoa rârâ nana apono muli pa vetâŋa ninde rârâni. <sup>15</sup>Taitu nia ndoyo, lâ zo ninde naŋa nana ipaguguana tia yo, ande Maro Kindeni ipatea naŋa lâ, aku nana i ne wisi-wisi kâ, ande isarawa naŋa tu ma apânnga i ne pâri-tamâta. <sup>16</sup>Aku i ilo pateo tu ma itula tamwata natu Yesu Kiriisi kilala pwataki pana, nana naŋa ma akura tu atula i natu parina panzi tamâta lâ tinikoa ŋgu. Aku lâ zo ninde Maro Kindeni itula Yesu Kiriisi kilala pwataki pa naŋa, ande naŋa nandai alâ akasoŋanzi tamâta pinde tu ma sipananana nana pâri ara kâ. <sup>17</sup>Aku lâ zo ninde, naŋa nandai akâki alâ pa Jerusalem lawea nana aporo panzi tamâta ninde simuŋga pa naŋa nana simo pâri-tamâta. Lâ zo ndainani nâ,

naŋa aŋgeŋge ŋana Jerusalem lawea aku amandi alâ pa nia bilimu tonŋe ikeno Arebia tâno. Aku muli ŋga ataulo alâ pa Damaskus lawea kilo.

<sup>18</sup>Mbwera ŋato ilâ lâ, ŋineŋga akâki alâ pa Jerusalem lawea ŋana aveta mete kuku Petero. Andeta naŋa amo soŋgo tia; amo ndaina kuku Petero ikura sânda rua nâ. <sup>19</sup>Lâ zo ŋinde naŋa amo kuku Petero, ande naŋa aporo pa pâri-tamâta tonŋe, ande tia. Naporo pa Yamesi simbo nâ, ina nenda Maro Ŋjalae Yesu tai. <sup>20</sup>Kala ŋine naŋa apaimi lâ Maro Kindeni nao tu ŋgua ŋine kala aŋgere lâ pepa tini, ande ŋgua mao kanaŋo. <sup>21</sup>Naŋa amo kuku Petero lee marumbu lâ, ŋineŋga ataulo pa Siria tâno aŋga Silisia tâno kilo. <sup>22</sup>Lâ zo ŋinde, kinzi kalo-tawana tamâta lâ Yesu Kirisi ne ŋgu ŋinde simo Judia tâno, ande kinzi ŋinde sizizâla ŋana naŋa naonŋu. <sup>23</sup>Taitu siloŋo nawalanzi situ naŋa parinâŋgu mine tu, “Tamâta ŋinde kala muŋga iveta kie sakamao pa kinda, ande kala zo ŋine tamâtani ndaina uru itula pâri ara ŋine kinda uru kalonda tawana. Taitu muŋgani ikai wurâta ŋana izavaru pâri ara ndainani nâ.” <sup>24</sup>Kinzi siloŋo pâri ŋana vetâŋa rârâni ŋinde Maro Kindeni iveta pa naŋa, kala sipanea i ŋa.

#### **Kinzi pâri-tamâta pinde sio ilonzi ilâ taitu kuku Paulo**

**2** <sup>1</sup>Naŋa amo lee, mbwera saŋao kanaŋo ŋapa ilâ lâ. Ŋineŋga maka rua Banabas rua kakâki kalâ Jerusalem lawea kilo. Aku naŋa akai Titi iyoka kuma tona.

<sup>2</sup>Maro Kindeni tamwata itula pa naŋa mine tu naŋa ma alâ amo Jerusalem. Aku lâ zo naŋa amo Jerusalem, ande naŋa atula pâri ara panzi, pâri ara ndainani naŋa uru atula panzi tamâta simo lâ tinikoa ŋgu. Andeta naŋa ŋandai aporo ŋgua ŋinde lâ tamâta rârâ naonzi ŋga. Naŋa tiniŋgu pwâka tu nanenŋu wurâta ŋana atula pâri ara kâ ma ipâŋga kaa nâ. Mine kala akainzi kalo-tawana tamâta mbâna-mbâna pinde kalâ pa nia ŋgaŋe, ŋineŋga aporo ŋgua panzi. Tamâta pinde uru siporo ŋgua ŋananzi kalo-tawana tamâta ŋinde mine tu, “Kinzi nde poe tamâta”. <sup>3</sup>Titi imo kuku naŋa, aku i nde Grik tamwata, i Juda tamâta tia. Aku Yesu Kirisi ne kalo-tawana tamâta laŋeŋa pinde siporo kaika tu maka ma kave Titi karae, itogo Juda nenzi mâsi mine. Andeta maka kaveta mine tia. <sup>4</sup>Kinzi kalo-tawana tamâta laŋeŋa ŋinde sipavea nâ ku simâ maka ŋginima. Kinzi sisama tu maka kaloma tawana Yesu Kirisi, aku kapile mâsi ŋana kaponu muli pa Juda nenzi ŋgua tukuŋa kâ, kala ilonzi tu silea pa nema vetâŋa. Ŋgua tukuŋa ŋinde nde itogo nimbu tonŋe muŋga Yesu Kirisi ipalalana piti lâ tinima, andeta kinzi ilonzi tu ma sio nimbu ŋinde ilâ ŋana isusu maka kilo. <sup>5</sup>Andeta maka ŋandai kasâu pa nenzi ŋgua ŋana kave Titi karae ŋga. Maka kamandi kaika, aku kapu nenzi ŋgua rârâni ŋinde ndue lâ. Maka tinima pwâka tu ŋgua tukuŋa siŋga ma imâ ikai Yesu Kirisi ne pâri ara nia. I ne pâri ara ŋinde nde mao kanaŋo, aku ŋine nde ŋana isuka miki ikura zo rârâni.

<sup>6</sup>Lâ zo ñinde maka kapasau kunzi tamâta mbâna-mbâna ñinde, ande kinzi sisenge ñgua tonje lâ nanenğu ñgua, ande tia. Tamâta pinde uru siporo ñgua ñananzi tamâta mbâna-mbâna ñinde mine tu, “Kinzi nde poe tamâta”. Andeta lâ naña warakânğu nâ ilonğu, ñgua ñinde nde kaa nâ, ñana tu Maro Kindeni ilo ñana tamâta ñanzi kâ, ande tia. <sup>7</sup>Kinzi tamâta mbâna-mbâna ñinde ilonzi kalonzi ipânğu tu Maro Kindeni wurâta ilua naña ñana atula pâri ara panzi tamâta lâ tinikoa ñgu, itogo nanayoni i wurâta ilua Petero ñana itula pâri ara panzi Juda tamâta mine. Mine kala nenzi ñgua tia. <sup>8</sup>Mao nâ, Maro Kindeni walo kaika ilua Petero ñana ma imo pâri-tamâta panzi Juda tamâta. Aku mine nâ, Maro Kindeni tamwata ne walo kaika ilua naña ñana amo pâri-tamâta panzi tinikoa ñgu. <sup>9</sup>Tamâta pinde uru siporo ñgua ñana Yamesi, Petero anğa Yoane mine tu, “Kinzi nde poe tamâta”. Andeta lâ zo ñana tamâta ñato ñinde ilonzi kalonzi ipânğu tu Maro Kindeni io ne wisi-wisi imâ pa naña lâ, ande kinzi sitaño maka rua Banabas rua mbauma, aku sikaima togo ninzi-nambwe wukale mine. Ñineŋga kinzi wa maka wa kao iloma kaloma ilâ taitu, aku kapa ñgua mine tu maka ma katula pâri ara panzi tinikoa ñgu, anğa kinzi ma situla pâri ara panzi Juda ñgu. <sup>10</sup>Kinzi siporo ñgua taitu nâ pa maka rua mine tu, “Maka iloma tu miki rua ma kagona mbumbu ñana kalanzi nawalânda kalotawana tamâta simo sugorai lâ Jerusalem lawea, itogo miki rua muŋga kaveta mine.” Andeta nia ndoyo naña ilonğu patea tu naña ma aveta vetâñani ndaina.

### **Paulo itula Petero ne vetâña soki pwataki**

<sup>11</sup>Andeta muli ñga Petero imâ imo Antiok lawea ikura zo pinde, aku pa zo ñinde naña amandi i tamwata nao aku ambita pâta kanaño, ñana tu iveta vetâña soki ndo. <sup>12</sup>Mao nâ, nia ndoyo iveta vetâña ara ñana isaño ika kâpwa kunzi kalo-tawana tamâta lâ tinikoa ñgu. Andeta muli ñga, tamâta pinde lâ Yamesi ne ñgu simâ sipânğu lâ, ñineŋga Petero itaulo pa Juda nenzi mâsi ñana tininzi piti ndo ñananzi tamâta lâ tinikoa ñgu. I ne vetâña ñinde nde duvi mine; iruru ñananzi kalo-tawana tamâta ñgu ñinde uru sipaveta kuku Juda nenzi vetâña rârâni. <sup>13</sup>Aku kinzi Juda ñgu kalo-tawana tamâta rârâni kala sipono muli pa Petero ne vetâña lañeña ñinde. Ñineŋga sisowe Banabas ilo kalo, ande kala iveta vetâña lañeña ndainani nâ kunzi tona.

<sup>14</sup>Naña amora tu kinzi ñandai sipono muli sondo pa pâri ara ne ñgua ñga. Tia ku naña amandi kinzi rârâni naonzi aku apai Petero tu, “Noko nde Juda tamwata, andeta kupile Juda nenzi vetâña ku kupaveta kuku tinikoa ñgu nenzi vetâña. Mine nde ñana sâ kâ ñga noko kuporo kaika panzi tamâta lâ tinikoa ñgu tu ma sipaveta kuku Juda nenzi vetâña, a?”

### **Ambo tamâta tonje kalo tawana Yesu, ande ipânğu tamâta sondo ndo lâ Maro Kindeni nao**

<sup>15</sup>Ñineŋga naña apai Petero tu, “Kinda tinânda sipagugua kinda tapânğu Juda laluna. Mine kala kinda ñandai tamo tatogonzi ‘kiesaka

tamwatanzi' lâ tinikoa ŋgu. <sup>16</sup>Aku kinda tasama tu ambo tamâta tonje ikai wurâta ŋalae ŋana ipono muli pa Mose ne ŋgua tukuŋa, ande vetâŋa ŋinde ikura tu iveta i ipâŋga tamâta sondo lâ Maro Kindeni nao, ande tia. Ambo tamâta tonje kalo tawana Yesu Kirisi, ande i ne kalo-tawana ŋinde nâ ikura tu iveta i ipâŋga tamâta sondo lâ Maro Kindeni nao. Aku kinda kala mine nâ tao nenda kalo-tawana ilâ pa Yesu Kirisi lâ, ŋana tu kinda tasama ŋine; nenda kalo-tawana ŋinde iveta kinda tapâŋga tamâta sondo lâ Maro Kindeni nao. Kinda tapile nzâla ŋana toka Mose ne ŋgua tukuŋa muli, ŋana tu nzâla ŋinde ikura tu iveta tamâta tonje ipâŋga tamâta sondo lâ Maro Kindeni nao, ande tia ndo.

<sup>17</sup>Kinda nenda kalo-tawana ikeno pa Kirisi, aku ilonda tu kalo-tawana ŋinde iveta kinda tapâŋga tamâta sondo lâ Maro Kindeni nao. Aku lâ zo ŋana kinda tapile nzâla ŋana toka Mose ne ŋgua tukuŋa muli, ande lâ ŋgua tukuŋa nao kinda tapâŋga tatogonzi kiesaka tamwatanzi lâ tinikoa ŋgu mine. Mine kala ma taporo mana; tiambo ma taporo tu 'Kirisi tamwata ilo tu iveta kiesaka ipâŋga ŋalae', tiya? Tia ndo kanaŋo! <sup>18</sup>Ambo naŋa ma apile nzâla ŋana ayoka Mose ne ŋgua tukuŋa muli, andeta muli ŋga naŋa ma apono muli pa nzâlani ndaina kilo, ande vetâŋa ŋinde ma itula pwataki tu naŋa nde kiesaka tamwatâŋgu. <sup>19</sup>Ŋana tu Mose ne ŋgua tukuŋa io naŋa lâ nzâla ŋinde ilâ pa mateŋa kâ. Andeta naŋa ilonŋu tu aveta ikura Maro Kindeni ne pateâŋa mine, kala apile nzâla ŋinde marumbu lâ.

<sup>20</sup>Ŋinde itogo naŋa amâte lâ kâi popole tini kuku Kirisi. Taitu kala ŋine akai via wasaseki lâ. Naŋa muŋga akai poe pa warakâŋgu ŋeŋgu via, andeta kala ŋine Kirisi imo ilonŋu, aku uru ikai poe pa naŋa. Kala ŋine naŋa kalonŋu tawana Maro Kindeni Natu, inani tini mwasa ndo pa naŋa kala ipile tamwata ne via ku imâte ŋana ikai naŋa piti lâ kondoma ilo. Aku nanenŋu kalo-tawana ŋine uru igagati naŋa ilonŋu kalonŋu ŋana aveta vetâŋa ara lâ tâno kulu.

<sup>21</sup>Naŋa tiningu pwâka tu aveta Maro Kindeni ne wisi-wisi ipâŋga itogo kelekele kaa nâ mine. Kuloŋo ŋga; ambo Mose ne ŋgua tukuŋa ikura ŋana iveta kinda tapâŋga ilonda mbâra-mbâra lâ Maro Kindeni nao, ande Kirisi imâte koa tia nâ. Andeta tia." Naŋa Paulo aporo ŋgua mine pa Petero.

**Mâsi ŋana toka ŋgua tukuŋa muli kâ, aŋga mâsi  
ŋana kalonda tawana Yesu Kirisi kâ**

**3** <sup>1</sup>Miki Galesia tamâta ilomi kalomi sondo tia ndo! Tamâta ea iyaula nemi ilo-kalo, a? Naŋa muŋga atula Yesu parina pwataki pami lâ. Mine kala itogo miki warakami kamora Yesu itâra lâ kâi popole tini imâte.

<sup>2</sup>Naŋa atu akasonjami kasonjâŋa taitu nâ. Miki muŋga kaveta vetâŋa ndia ŋinenŋa Koroani Sapâŋa imâ ilomi, a? Tiambo miki kapaveta

kuku ŋgua tukuŋa lâ, ŋineŋga kakai Koroani Sapâŋa, tiya? Tia ndo! Miki kaloŋo Yesu ne pâri ara aku kalomi tawana lâ, aku kalo-tawana ŋinde nâ ikai nzâla piti pa Koroani Sapâŋa tu imâ pami. <sup>3</sup>Miki nde kapa ndo! Nia ndoyo, lâ zo ŋinde nemi kalo-tawana ipâŋga wasaseki, ande Koroani Sapâŋa ne kaika uru isukami. Aŋga lâ zo ŋine miki katu warakami nemi kaika ikura tu isuka nemi via lâ tâno kulu, a? <sup>4</sup>Malia pinde nde imâ ipâŋga pami lâ; tiambo malia ŋinde isukami tia, a? Taitu nanenŋgu morâŋa tu malia ŋinde nde isukami lâ. <sup>5</sup>Mao nâ, Maro Kindeni ne Koroani Sapâŋa ilua miki lâ, aku uru iveta mâsi kaika rârà ipâŋga ŋginimi. Tiambo Maro Kindeni imora tu miki uru kapaveta kuku Mose ne ŋgua tukuŋa, aku ŋana duvi ŋinde kâ iveta kie ara ŋinde pami, tiya? Tia ndo! Miki kaloŋo pâri ara aku kalomi tawana, aku ŋana duvi ŋinde kâ iveta mine pami.

<sup>6</sup>Miki kalomi ŋgere sondo ŋana Abraham kâ. Maro Kindeni kawa ŋgua ikeno lâ pepa tini mine tu,

“Abraham kalo tawana Maro Kindeni, aku ŋana i ne kalo-tawana ŋinde kâ, ande ipâŋga ilo mbâra-mbâra lâ Maro Kindeni nao.”

<sup>7</sup>Mine nde kaloŋo ŋga; tamâta ea kalonzi tawana Yesu Kirisi, kinzi ŋinde sipâŋga sitogo Abraham ne vâsa mao. <sup>8</sup>Nia ndoyo Maro Kindeni ilo patea tu tamâta pinde lâ tinikoa ŋgu ma kalonzi tawana i, aku nenzi kalo-tawana ŋinde ma ivetanzi sipâŋga tamâta sondo lâ i nao. Mine kala nanayoni Maro Kindeni itula pâri ara pa Abraham mine tu,

“Noko kalo tawana naŋa lâ, aku ŋana duvi ŋinde kâ naŋa ma aveta kenŋgu ara ndo panzi tamâta râràni simo tâno ndoni.”

<sup>9</sup>Mine nde Maro Kindeni iveta kie ara nâ panzi tamâta ea kalonzi tawana i, itogo muŋga iveta pa Abraham, ina tamâta ŋana kalo-tawana mao kâ.

<sup>10</sup>Taitu tamâta ea ilonzi tu nzâla ŋana soka Mose ne ŋgua tukuŋa muli nde nzâla ŋana sipâŋga tamâta sondo lâ Maro Kindeni nao, ande Maro Kindeni ma izavarunzi tamâta ŋinde. Ŋana tu i kawa ŋgua ikeno lâ pepa tini mine tu,

“Mose ŋgere ŋgua tukuŋa lâ pepa tini ikeno lâ. Ambo tamâta tonŋe ŋandai ipaveta mao kuku ŋgua tukuŋa ŋinde râràni taitu-taitu ikura zo râràni, ande Maro Kindeni ma izavaru tamâta ŋinde.”

<sup>11</sup>Aku Maro Kindeni kawa ŋgua tonŋe kala ikeno lâ pepa tini mine tu,

“Tamâta ea kalonzi tawana Maro Kindeni, ande kinzi tamâta ŋinde simo ilonzi mbâra-mbâra lâ i nao, aku sikai via mao.”

Ŋgua ŋinde itula pwataki pa kinda tu ambo tamâta tonŋe itu ipono muli pa Mose ne ŋgua tukuŋa, ande i ne vetâŋa ŋinde ikura tu iveta i ipâŋga tamâta sondo lâ Maro Kindeni nao, ande tia. <sup>12</sup>Ŋana tu mâsi ŋana tapono muli pa Mose ne ŋgua tukuŋa kâ, ande ikeno piti ndo ŋana kalo-tawana ne mâsi. Maro Kindeni kawa ŋgua ikeno lâ pepa tini mine tu, “Tamâta ea

uru ipono muli mao pa ngua tukuŋa rârâni ikura zo rârâni, ande tamâta ŋinde ma ikai via mao.” Andeta tamâta tonje ikura tu iveta mine, ande tia.

<sup>13</sup>Andeta Kirisi ikai kinda niânda, aku Maro Kindeni izavaru i ndo lâ. Vetâŋa ŋinde ne duvi nde mine; Maro Kindeni kawa ngua ikeno lâ pepa tini mine tu, “Maro Kindeni ma izavaru tamâta ea itâra lâ kâi popole tini”. Aku ŋana Kirisi ne vetâŋa ŋinde kâ, ande iyaute kinda piti lâ ngua tukuŋa ne zavaruŋa. <sup>14</sup>Muŋgani Maro Kindeni ipa ngua kuku Abraham tu i ma iveta vetâŋa ara tonje. Aku Yesu Kirisi ne mateŋa ikai nzâla piti panzi tamâta lâ tinikoa ŋgu ŋana vetâŋa ara ŋinde ma ilâ pa kinzi tona. Mine kala ŋana nenda kalo-tawana kâ, ande kinda takura tu takai Koroani Sapâŋa lâ ilonda, ikura Maro Kindeni ne ngua pâŋa mine.

**Mose ne ngua tukuŋa ŋandai isoki ngua pâŋa Maro  
Kindeni iveta kuku Abraham ŋinde piti ŋga**

<sup>15</sup>Niŋgu-nambwe wukale, kala ŋine naŋa ma aporo ngua ŋana kinda tamâta nenda mâsi tonje. Ambo tamâta rua ma singere ngua lâ pepa tini ŋana vetâŋa tonje ilonzi patea tu ma siveta, ande nenzi ngua ŋinde ipâŋga itogo ngua pâŋa kaika mwasina, aku tamâta tonje ikura tu itoto nenzi ngua ŋinde tâku isenje ngua tonje ilâ kuku ngua ŋinde tâ, ande tia. <sup>16</sup>Nanayoni, Maro Kindeni ipa ngua kuku Abraham tava i ne vâsa, ŋana i ma muli iveta kie ara panzi. Maro Kindeni ne ngua pâŋa ŋinde nde ikeno lâ pepa tini tamora lâ. Maro Kindeni ipai Abraham mine tu, “Naŋa ma aveta keŋgu ara papa noko ne vâsa.” I ŋandai iporo tu, “Naŋa ma aveta keŋgu ara panzi noko ne vâsa kinzi”, ande tia. Mine kala kinda tasama tu Maro Kindeni ŋandai iporo ŋananzi tamâta rârâ ŋga. Iporo ŋana tamâta taitu nâ, ina kala Kirisi.

<sup>17</sup>Nanenge ngua ŋine ne duvi ande mine; nia ndoyo Maro Kindeni ipa ngua ndainani nâ kuku Abraham. Simo lee, aku mbwera 430 ilâ lâ, ŋinenŋa Maro Kindeni itula ngua tukuŋa pa Mose. Iŋgua tukuŋa nde ipâŋga muli, taitu tukuŋa ŋinde ikura ŋana itoto Maro Kindeni ne ngua pâŋa muŋgâŋa ŋinde ku iveta ipâŋga kaa nâ, ande ikura tia. <sup>18</sup>Ambo mâsi ŋana taponu muli pa tukuŋa kâ ikura tu igagati Maro Kindeni ŋana iveta kie ara pa kinda, ande i ne ngua pâŋa muŋgâŋa ŋinde nde ipâŋga itogo kelekele kaa nâ. Andeta tia. Kinda tasama tu Maro Kindeni muŋgani ipa ngua tu ma iveta kie ara pa Abraham, aku ŋana i ne ngua pâŋa ŋinde nâ, ande iveta vetâŋa ndainani papa i.

<sup>19</sup>Ambo mine, ande Maro Kindeni itula ngua tukuŋa pa Mose ŋana duvi mana, a? ŋinde nde duvi mine; Maro Kindeni ilo tu tamâta rârâni ma sisama sondu tu kinzi nde kiesaka tamwatanzi. Mine kala iveta ne ngua pâŋa muŋga lâ, ŋinenŋa itula tukuŋa pa Mose tona ŋana i ma itula panzi tamâta. I ipatea tu kinzi Juda tamâta ma sipono muli pa tukuŋa

ņinde lee, ikura lâ zo ñinde Abraham ne Vâsa ma imâ ipâņga, inani kala tamâta ñinde Maro Kindeni ne ñgua pâņa iporo ñana. Taitu kaloņo ñga; Maro Kindeni tamwata ñandai itula tukuņa ñinde panzi tamâta ñga. Itula ñinde panzi aņelo, ñineņga kinzi kala situla papa kuleņa tamâta Mose. <sup>20</sup>Andeta Maro Kindeni ne ñgua pâņa nde kelekele ñalae tina, ipole ne ñgua tukuņa, ñana tu Maro Kindeni tamwata iveta ñgua pâņa ñinde kuku Abraham. Tamâta tonņe ikai ñgua ñinde ku ilâ itula pa Abraham, ande tia.

### **Ñgua tukuņa ne wurâta nde ñana ikai kinda talâ pa Kirisi**

<sup>21</sup>Mine kala Mose ne ñgua tukuņa uru ikai kazâņa pa Maro Kindeni ne ñgua pâņa rârâni, tiya? Tia ndo kanaņo! Ambo Maro Kindeni muņga itu tukuņa kie tonņe panzi tamâta, aku tukuņa ñinde ikura tu via mao ilanzi, ande tamâta ea sipono muli pa tukuņa ñinde ma sipâņga ilonzi mbârambâra lâ Maro Kindeni nao. <sup>22</sup>Andeta tia. Maro Kindeni kawa ñgua ikeno lâ pepa tini mine tu, “Kiesaka nde itogo wâlo kaika mine ilitanzi tamâta rârâni marumbu lâ.” Mine kala Maro Kindeni iveta kie ara panzi tamâta ñinde uru kalonzi tawana Yesu Kirisi, ikura muņga ipa ñgua tu ma iveta mine.

<sup>23</sup>Muņgani, lâ zo ñinde nzâla ipâņga tia yo ñana kinda takura tu kalonda tawana Yesu Kirisi, ande Mose ne ñgua tukuņa ipa wâlo kaika lâ tininda. Kinda tamo mine lee, ikura lâ zo ñinde kalo-tawana ne nzâla ipâņga nia yo lâ. <sup>24</sup>Mine kala ñgua tukuņa imo itogo nenda koipu muņgâņa mwasina, aku ne wurâta nde ñana ikai kinda talâ pa Kirisi. Mine kala ñana nenda kalo tawana kâ, ande kinda tapâņga tamâta sondo lâ Maro Kindeni nao.

<sup>25</sup>Aņga lâ zo ñine, ande ñgua tukuņa imo nenda koipu kilo, ande tia, ñana tu kalo-tawana ne nzâla nde imâ ipâņga lâ.

### **Kinda nenda kalo-tawana iveta kinda tapâņga Maro Kindeni natu wukale**

<sup>26</sup>Miki kalomi tawana Yesu Kirisi, aku ñana kalo-tawana ñinde kâ Maro Kindeni iveta miki rârâni kapâņga i natu wukale lâ. <sup>27</sup>Muņga, lâ zo ñinde miki kakai lââ-liliņa, ande miki kapaipa lâ taitu kuku Kirisi. Kala ñine Kirisi kilala itura miki ndo lâ, itogo nemi pasawaņa mwasina. <sup>28</sup>Mine kala miki Juda tamâta wa miki tamâta lâ tinikoa ñgu wa; miki tamâta uru kaveta wurâta koa tia nâ wa miki tamâta kamo ara wa; miki tamâne wa miki taine wa; miki rârâni kaloņo ñga. Lâ Maro Kindeni nao, ande miki rârâni kamo rege-rege nâ, ñana tu miki kapaipa kuku Yesu Kirisi lâ, kala kamo ñgu taitu. <sup>29</sup>Miki kamo Yesu Kirisi ne ñgu. Mine kala miki kamo Abraham ne vâsa tona, aku Maro Kindeni ma iveta kie ara ndainani nâ pa miki, ikura muņga ipa ñgua tu ma iveta pa Abraham mine.



**Yesu Kirisi ipalalana ngua tukuņa ne nimbu piti lâ tininda**

**4** <sup>1</sup>Miki kalomi ngere ŋananzi lâlu kiri-kiri. Muli ŋga lâlu ŋinde ma sikai tamanzi nenzi tâno wa kelekele ndoni. Andeta lâ zo ŋana kinzi simo lâlu kiri-kiri yo, ande kinzi simo rege-rege nâ kunzi tamanzi nenzi wurâta tamâta, kinzi ŋinde uru siveta wurâta koa tia nâ. <sup>2</sup>Tamâta pinde uru sikai poe panzi lâlu kiri-kiri ŋinde, aku uru sikatona nenzi kelekele tona. Kinzi siveta mine lee, ikura lâ zo ndia tamanzi sipatea tu natunzi ŋinde ma sikai nenzi kelekele rârâni ŋinde. <sup>3</sup>Aku kinda kala tamo mine nâ. Muņa, lâ zo ŋinde tamo tatogonzi lâlu kiri-kiri mine, ande ngua tukuņa kiri-kiri ŋana tâno ŋine ne vetâņa kaa kaa nâ uru ikai poe kaika pa kinda.

<sup>4</sup>Kinda tamo mine lee, ŋineņa zo ipâņa lâ, ikura Maro Kindeni ne pateâņa mine. Aku lâ zoni ndaina, Maro Kindeni isupwa i tamwata Natu indue imâ imo tâno kulu. Ipâņa tamâta mao, aku uru imo Mose ne ngua tukuņa kalo. <sup>5</sup>I imâ ŋana ipalalana ngua tukuņa ne nimbu piti lâ tamâta tininzi, ŋana kinda rârâni ma tapâņa tamo Maro Kindeni natu wukale.

<sup>6</sup>Maro Kindeni isupwa i Natu ne Koroani imâ imo ilonda lâ, aku vetâņa ŋinde itula pwataki tu miki kamo Maro Kindeni natu wukale. Aku Koroani Sapâņa ŋinde uru ipaņo ilonda kalonda kala tata pa Maro Kindeni tu, “Mama, Mama”. <sup>7</sup>Mine kala ngua tukuņa ma ikai poe kaika pa miki kilo, ande tia. Miki taitu-taitu kamo Maro Kindeni natu wukale. Mao nâ, miki nde Maro Kindeni natu wukale. Mine kala Maro Kindeni ma iveta kie ara pa miki taitu-taitu, itogo muņa ipa ngua tu ma iveta panzi i natu wukale mine.

**Paulo kalo loko ŋalae ŋananzi Galesia kalo-tawana tamâta**

<sup>8</sup>Muņa, miki ŋandai kasama Maro Kindeni kilala sondo ŋga. Mine kala lâ zo muņgâņa ŋinde miki kamo tamâta ŋana kaveta wurâta koa tia nâ panzi maro pinde. Andeta maro ŋinde nde maro laņeņa nâ. <sup>9</sup>Taitu kala ŋine miki kapaipa kuku Maro Kindeni marumbu lâ. Andeta nanenģu ngua ŋine nde sondo tia, ŋana tu Maro Kindeni ipaipa kuku miki. Mine nde ŋana sâ kâ ŋga miki ilomi tu kapono muli kilo papa ngua tukuņa kiri-kiri ŋana tâno ŋine ne vetâņa kaa kaa, a? Ŋana sâ kâ ŋga ilomi tu kelekele sugorai ma ikai poe kaika pami kilo, a? <sup>10</sup>Opopo, miki uru kapaveta kuku Juda nenzi ngua tukuņa kiri-kiri ŋana zo sapâņa kie-kie wa kâņa-nuņa ne zo kie-kie wa, aku miki katu vetâņa mine ma ivetami kapâņa tamâta sondo lâ Maro Kindeni nao. <sup>11</sup>Naņa kalonģu loko ŋalae tina ŋana miki kâ! Tiambo nanenģu wurâta rârâni muņa aveta ŋana avilami kâ nde ilâ kaa nâ, a?

<sup>12</sup>Niņģu-nambwe wukale, muņa, lâ zo ŋinde naņa amo kumi, ande miki wa naņa wa kalonda tawana tu ngua tukuņa ŋandai ikura tu iveta

kinda tapânga tamâta sondo lâ Maro Kindeni nao. Naņa ano pami tu miki ma kakai ngua tukuņa ne wâlo piti lâ tinimi kilo, ņana miki ma kamo ara, itogo naņa uru amo mine. Muņa, miki ņandai kaveta vetâņa soki tonģe papa naņa ņa. <sup>13</sup>Kalomi ņgere sondo ņa; nia ndoyo, naņa amo kuku miki tia yo. Ғineņa pukonņa ikai naņa, aku pukonņa ņinde ikai nzâla piti pana tu ma amâ atula pâri ara pami. <sup>14</sup>Lâ zo ņinde, nanenģu pukonņa ņinde iveta malia ņalae ndo pami. Taitu miki ņandai kapu mulimi papa naņa ņa, aku miki ņandai kasoki naņa ņa. Miki kaveta vetâņa ara ndo pana, itogo vetâņa ndia miki ma kaveta pa Maro Kindeni ne anģelo tonģe tâku Kirisi tamwata tâku.

<sup>15</sup>Lâ zo ņinde, ande miki uru ilomi ara ku kamo kandeka nâ. Anģa lâ zo ņine, ande nemi ndekâņa ņinde ikeno ndia, a? Naņa aporo ngua mao kanaņo; muņa, lâ zo ņinde naņa amo kumi, ande miki ilomi ņalae ndo tu kavila naņa. Mine kala, ambo miki ma kakura tu kapasiki matami piti kalua naņa ņana ivilana kâ, ande miki ma kaveta mine nâ. <sup>16</sup>Mana mana, a? Naņa uru atula ngua mao nâ pami, aku ņana duvi ņinde kâ miki katu naņa nde nemi kazâņa tamâta, a?

<sup>17</sup>Miki kalonģo ņa. Tamâta pinde uru sikai wurâta kaika ņana siporo ngua kaņa mona-mona pami ņana sisowe ilomi kalomi kâ. Taitu kinzi ilonzi tu sivila miki, ande tia ndo. Ilonzi tu miki ma kapu mulimi pa naņa, aku kaponu muli pa nenzi ngua. <sup>18</sup>Ambo tamâta tonģe itu ivila miki sondo, aku ņana duvi ņinde kâ ikai wurâta ņana isowe ilomi kalomi kâ, ande ņinde ara. Mao nâ, ambo naņa amo kuku miki tâku amo malawae ņanami tâ, ande vetâņa kie mine nde ara ndo.

<sup>19</sup>Naņa natunģu wukale, naņa ilonģu malia ndo ņanami kilo, itogo taine ilo malia lâ pagugunņa ne zo. Naņa ma amo mine lee, ikura lâ zo ndia nemi kalo-tawana ma ilâ sondo ndo pa Kirisi. <sup>20</sup>Naņa ilonģu ņalae tu amâ amo kumi. Ambo naņa ma amo kumi, ande naņa ma aporo ngua mwasa nâ pami. Oyae, naņa kalonģu loko ņanami!

### Hagar kuku Sara rua parinanzi

<sup>21</sup>Miki tamâta pinde ilomi tu kamo Mose ne ngua tukuņa kalo. Ayo, miki tamâta ņinde kalonģo nanenģu ngua ņine sondo ņa. Tiambo miki kazizâla tâ ņana ngua tukuņa ne duvi, a? <sup>22</sup>Maro Kindeni kawa ngua ikeno lâ pepa tini mine tu Abraham ipulianzi natu tamâne rua sipânģa. I kaiwa tonģe, i ņa mine Hagar, ande imo Abraham ne wurâta taine kaa nâ. Hagar ipagugua natu tamâne tonģe ipânģa, i ņa mine Ismael. Anģa Abraham kaiwa mao, i ņa mine Sara, ande i ņandai taine ņana iveta wurâta koa tia nâ. Sara kala ipagugua natu tamâne tonģe ipânģa, i ņa mine Isaka. <sup>23</sup>Wurâta taine kaa nâ ņinde natu nde ipânģa lâ vetâņa kie taituni itogo kinda tamâta uru tapulianzi natunda mine. Anģa Abraham kaiwa mao ņinde natu nde ipânģa lâ vetâņa kie tonģe; Maro Kindeni

munḡani ipa ḡgua kuku Abraham tu natu ḡinde ma ipânḡa, kala ḡgua pânḡa ḡinde ipânḡa kanaḡo.

<sup>24</sup>Kala ḡine naḡa ma atambira ḡgua lâ taine rua ḡinde tininzi. Kinzi rua nde sitogo ḡgua pânḡa rua. Hagar nde itogo ḡgua pânḡa siḡḡa ḡinde Mose ikai lâ Sinai tuu kulu, aku i natu wukale simo Mose ne ḡgua tukuḡa kalo. <sup>25</sup>Hagar nde itogo Sinai Tuu, tuu ḡinde imandi lâ Arebia tâno. Aku mine nâ, lâ zo ḡine, ande Hagar itogo Jerusalem lawea tona, ḡana tu Mose ne tukuḡa uru ikai poe kaika panzi tamâta simo Jerusalem lawea ḡinde tona. <sup>26</sup>Andeta Jerusalem lawea mao nde Maro Kindeni ne lawea ikeno âta ḡinde, aku kelekele toḡḡe ḡana ikai poe kaika panzi tamâta simo lawea ḡinde, ande tia. Lawea ḡinde nde itogo kinda tinânda mwasina. <sup>27</sup>Maro Kindeni kawa ḡgua ikeno lâ pepa tini mine tu,

“Noko taine niḡḡa, noko kundeka! Noko taine niḡḡa ḡai, nokoni ḡandai kusama paguḡḡa ne nâna, ande noko kusuḡa kawa kâki tava ndekâḡa nâ! Iḡana tu muḡḡa noko kaiwa tamâne ipileno ku ilâ lâ, andeta noko ma kupaguguanzi natu rârà, aku kambwaḡenzi ma ipole taine ḡinde natu kambwaḡenzi, ina kala kaiwa tamâne imo kuku yo.”

<sup>28</sup>Niḡḡu-nambwe wukale, miki kamo katogo Isaka mine, ḡana tu Maro Kindeni muḡḡa ipa ḡgua tu miki ma kamo i natu wukale. <sup>29</sup>Muḡḡa, ande Abraham natu Ismael, ina kala ipânḡa itogo natunda uru sipânḡa mine, ande ikai kazâḡa papa Abraham natu Isaka, ina kala Koroani Sapânḡa ne walo iveta ipânḡa lâ. Aku lâ zo ḡine, ande kinda kala tamora vetânḡa mine nâ. <sup>30</sup>Miki kalomi ḡgere sondo ḡana Maro Kindeni kawa ḡgua ikeno lâ pepa tini. Muḡḡa, ḡgua imâ pa Abraham mine tu, “Kusoki wurâta taine kaa nâ ḡinde tava i natu silâ. Wurâta taine natu ikura ḡana ikai tama ne kelekele pinde, itogo i kaiwa mao ḡinde natu ma muli ikai, ande tia.” <sup>31</sup>Mine nde niḡḡu-nambwe wukale, kinda tasama tu kinda ḡandai tatogonzi wurâta taine kaa nâ ḡinde natu wukale ḡḡa. Kinda tatogonzi Abraham kaiwa mao ḡinde natu wukale.

### Kinda ma tamo piti ndo ḡana ḡgua tukuḡa ne nimbu

**5** <sup>1</sup>Kirisi ilo tu kinda ma tamo tininda soo nâ. Mine kala ipalalana ḡgua tukuḡa ne nimbu piti lâ tininda marumbu lâ. Ayo, miki kamandi kaika, aku kapu mulimi panzi tamâta ea ilonzi tu Mose ne ḡgua tukuḡa ma ikai poe kaika pami kilo!

<sup>2</sup>Miki kaloḡo sondo ḡḡa. Naḡa Paulo warakânḡu apaimi tu ambo miki ilomi tu karae-veḡa ne mâsi ma ivetami kapânḡa tamâta sondo lâ Maro Kindeni nao, aku ḡana duvi ḡinde kâ miki ma kasâu panzi Juda tamâta tu ma sive karaemi, ande Kirisi ne mateḡa ma ikura ḡana ivilami tia ku tia ndo. <sup>3</sup>Naḡa aporo ḡgua kaika pami kilo mine; tamâta ea isâu panzi Juda tamâta tu ma sive i karae, ande tamâta ḡinde imo ḡgua tukuḡa

ndoni kalo. <sup>4</sup>Miki tamâta ea uru kapaveta kuku Mose ne tukuŋa, aku ŋana nemi vetâŋa ŋinde kâ miki katu ma kapâŋga tamâta sondo lâ Maro Kindeni nao, ande miki tamâta ŋinde kapatâpa warakami piti ndo lâ ŋana Kirisi kâ, kala kapu mulimi pa Maro Kindeni ne wisi-wisi marumbu lâ. <sup>5</sup>Aŋga maka kaloma tawana Kirisi, aku Koroani Sapâŋa uru isukama ŋana kao tinima ŋana zo muli kâ, lâ zo ŋinde Maro Kindeni ma iporo tu maka kamo iloma mbâra-mbâra lâ i nao. <sup>6</sup>Tamâta ea kinzi sipaipa kuku Yesu Kirisi lâ, kinzi ŋinde sisama mine; lâ Maro Kindeni nao, ambo tamâta tonŋe ikai karae-veŋa ne mâsi lâ tini tâku tia tâku, ande ŋinde nde kelekele kaa nâ. Taitu kaloŋo ŋga; ambo tamâta tonŋe kalo tawana Kirisi, aku ne kalo-tawana ŋinde igagati i ŋana tini mwasa ndo panzi i tini pinde, ande vetâŋa taituni ŋinde nde vetâŋa mao.

<sup>7</sup>Muŋga miki uru kao nemi kalo-tawana ilâ sondo ndo pa Kirisi. Aŋga tamâta ea ipono nzalami, kala kapu mulimi pa Maro Kindeni ne ŋgua mao kâ, a? <sup>8</sup>Vetâŋa mine ŋandai iyoka pa Maro Kindeni imâ ŋga, ŋana tu Maro Kindeni uru isarâwa pami tu kalâ kamo kuku i. <sup>9</sup>Miki kalomi ŋgere sondo ŋga. “Yisi tini mwata ikura ŋana ipundia puroŋa ndoni.”<sup>a</sup> <sup>10</sup>Andeta Maro Ŋalae ipu tini kaika pa naŋa, kala kaloŋgu tawana tu miki ma koka muliŋgu, aku ma kapu mulimi pa karae-veŋa ne mâsi. Tamâta ea itu iyaula ilomi kalomi ŋana kelekele ŋinde kâ, ande naŋa asama tia. Taitu naŋa asama tu Maro Kindeni ma ipare nia pa tamâta ŋinde. <sup>11</sup>Niŋgu-nambwe wukale, tamâta pinde silâŋe ku siporo tu naŋa uru atu ŋgua kaika panzi tamâta ŋana ma sikai karae-veŋa ne mâsi lâ tininzi. Andeta kaloŋo ŋga; ambo naŋa ma aporo ŋgua kaŋa mine, ande kinzi Juda tamâta ma sikai kazâŋa pa naŋa tia. Ambo naŋa ma asâu ŋana karae-veŋa ne mâsi kâ, ande kinzi Juda tamâta ma wisinzi nâna kilo ŋana ŋgua ŋana Yesu ne mateŋa lâ kâi popole tini kâ, ande ma tia. Andeta naŋa ŋandai asâu ŋana mâsi ŋinde ŋga. <sup>12</sup>Kinzi tamâta ŋinde uru sizavaru ilomi kalomi. Mine nde ikeno pa kinzi warakanzi; ambo situ sipaive warakanzi karaenzi, ande ara ŋana ma sipaive karaenzi ndoni!

<sup>13</sup>Niŋgu-nambwe wukale, miki kaloŋo ŋga. Maro Kindeni muŋgani ipateami ŋana ma kamo piti ndo ŋana ŋgua tukuŋa ne nimbu kâ. Taitu miki ma ilomi mine tu, “Ara, mine nde maka ma kapaveta kuku ilokalo siŋga ne vetâŋa kilo”, mine ndimo. Ara ŋana miki taitu-taitu ma kao ilomi ndo ilâ panzi kalo-tawana tamâta, aku kaveta vetâŋa ara nâ panzi ŋana isukanzi kâ. <sup>14</sup>Ŋgua tukuŋa taituni nâ inzuku Mose ne ŋgua tukuŋa rârâni. Ŋgua tukuŋa ŋinde nde mine; “Noko ma tini mwasa panzi tini pinde, itogo noko tini mwasa pa tamwata mine”. <sup>15</sup>Miki kapakatona sondo ŋga! Miki uru kapambita wa kakai kazâŋa potomule lâ warakami

<sup>a</sup> 5:9 Ŋgua siâŋa ŋine nde duvi mine; tamâta taitu nâ ne vetâŋa soki ikura ŋana iyaula tamâta rârâ ilonzi kalonzi.

nginimi, itogo ngoa ngoi uru siveta mine. Ambo miki ma kapile mâsi njinde tia, ande ma kapayaula warakami ndo lâ.

### **Koroani Sapâña ne vetâña, aŋga ilo-kalo siŋga ne vetâña**

<sup>16</sup>Naŋa apaimi tu ambo miki ma kapaveta kuku vetâña ndia Koroani Sapâña itula pami ikura zo zo, ande miki ma kakura ŋana kapaveta kuku ilo-kalo siŋga ne vetâña potomule, ande tia.

<sup>17</sup>Kinda tasama tu ilo-kalo siŋga uru ikai kazâña pa Koroani Sapâña, aku Koroani Sapâña kala uru ikai kazâña pa ilo-kalo siŋga mine nâ. Kinzi rua uru sipara ku simo nâ. Mine kala vetâña ndia miki ilomi pateva tu kaveta, ande miki kakura ŋana kaveta vetâña njinde, ande tia. <sup>18</sup>Andeta kalonjo ŋga; ambo Koroani Sapâña uru ikai poe pami, ande ŋgua tukuŋa ne wurâta ikeno ŋana ikai poe pami, ande tia. <sup>19</sup>Miki kasama lâ ŋana ilo-kalo siŋga ne vetâña kâ. Ilo-kalo njinde uru igagatinzi tamâta ŋana siveta vetâña potomule kie-kie mine; vetâña ŋana sipalulua tininzi potomule kâ, aŋga vetâña sakamao kie-kie, <sup>20</sup>aŋga vetâña ŋana sipaneanzi maro laŋeŋa kâ, aŋga vetâña ŋana siveta nzâambe sakamao kie-kie kâ, aŋga vetâña ŋana sikai kazâña panzi tininzi pinde kâ, aŋga vetâña ŋana sipawa ŋgua kâ, aŋga vetâña ŋana sipadâda kâ, aŋga vetâña ŋana wisinzi nâna kâ, aŋga vetâña ŋana sipasuka warakanzi tininzi kâ, aŋga vetâña ŋana sipwa pwapwataki kâ, <sup>21</sup>aŋga vetâña ŋana ilonzi yosi kâ, aŋga vetâña ŋana sinu lââ kaika ku sidauda kâ, aŋga vetâña ŋana sitara kawanzi pakâe-pakâe potomule kâ, aŋga vetâña kie-kie mine. Muŋga naŋa aporo ŋgua pami, kala njine aporo ŋgua kaŋa ŋainani kilo; tamâta ea kinzi uru siveta vetâña kie mine, ande kinzi tamâta njinde ma sikura tu simo Maro Kindeni ne ŋgumbi ilo, ande tia.

<sup>22</sup>Taitu Koroani Sapâña uru iveta ilo-kalo ara tava vetâña ara ipâŋga lâ ilonda kalonda. Njinde itogo Koroani Sapâña ipula kanaŋo ipâŋga lâ kinda nenda via mwasina. Vetâña arara njinde, ande mine; vetâña ŋana tininda mwasa ndo panzi tininda pinde kâ, aŋga vetâña ŋana ndekâña kâ, aŋga vetâña ŋana wisinda pisi kâ, aŋga vetâña ŋana wisinda nâna walele tia kâ, aŋga vetâña ŋana kalonda sukâña ŋananzi tamâta kâ, aŋga vetâña ŋana taveta kenda ara panzi tamâta kâ, aŋga vetâña ŋana taveta ikura nenda ŋgua pâña mine kâ, <sup>23</sup>aŋga vetâña ŋana tamo mwasa nâ kunzi tamâta kâ, aŋga vetâña ŋana tapu mulinda pa vetâña potomule kie-kie kâ. ŋgua tukuŋa tonje indi kaika ŋana vetâña kie mine, ande tia. <sup>24</sup>Tamâta ea kinzi kalonzi tawana Yesu Kirisi, kinzi njinde rârâni sipile ilo-kalo siŋga njinde marumbu lâ. Njinde itogo kinzi sipu ilo-kalo siŋga njinde lâ kâi popole tini imâte lâ. <sup>25</sup>Koroani Sapâña via mao ilua kinda lâ. Mine nde ara ŋana kinda ma taponu muli pa vetâña ndia Koroani Sapâña ipatea pa kinda. <sup>26</sup>Kinda ma tapasuka warakânda tininda ndimo. Aku kinda ma taveta vetâña pinde panzi ninda-nambwe kalo-tawana tamâta ŋana iveta wisinzi nâna kâ, mine ndimo. Aku kinda ma tapadâda ndimo.

**Kinda ma taveta vetâña ara nâ panzi tamâta**

**6** <sup>1</sup>Andeta niŋgu-nambwe wukale, miki kaloŋo ŋga; ambo miki kasama tu nawalami kalo-tawana tamâta tonje iveta kiesaka, ande ara ŋana miki tamâta ea Koroani Sapâña uru ikai poe pami ŋinde ma naomi mwasa nâ kavila tamâta ŋinde ŋana katu ne vetâña sakamao ŋinde sondo kâ. Taitu miki warakami taitu-taitu ma kapakatona sondo ndo. Tia ma Sadana ikai samâña pami, aku miki kala ma kaveta kiesaka tona. <sup>2</sup>Ara ŋana miki ma kavilanzi nimi-nambwe kalo-tawana tamâta ŋana sikale nenzi malia kâ. Ambo miki ma kaveta mine, ande nemi vetâña ŋinde ma iyoke Kirisi ne tukuŋa. <sup>3</sup>Ambo tamâta kaa tonje ipasuka tamwata tini, ande tamâta ŋinde ipalâŋe nâ. <sup>4</sup>Ara ŋana kinda taitu-taitu ma talea sondo pa warakânda nenda vetâña. Ambo tamâta tonje ne vetâña nde ara, ande i ma ikura tu indeka ŋana i tamwata nâ ne vetâña. Andeta wurâta ikeno pa kinda ŋana talea pa tamâta tonje ne vetâña, ande tia, <sup>5</sup>ŋana tu wurâta ikeno pa kinda rârâni taitu-taitu ŋana tapakatona warakânda nenda vetâña.

<sup>6</sup>Ambo tamâta tonje uru ipanananzi ŋgu pinde ŋana Maro Kindeni kawa ŋgua, ande ŋgu ŋinde ma sivila nenzi pananâña ŋinde, aku ma kelekele ara pinde silua.

<sup>7</sup>Miki ma kapalâŋe warakami ndimo. Tamâta tonje ikura ŋana ikai laŋeŋa pa Maro Kindeni tia ndo. Kaniña vâsa ndia noko kupau lâ tâno ilo, ande tâno ŋinde ma ipulia kaniña ndainani nâ. <sup>8</sup>Aku mine nâ, tamâta ea kinzi uru tininzi mwasa pa ilo-kalo siŋga kala soka muli, ande ŋinde itogo kinzi sipau vetâña kiesaka lâ ilonzi kalonzi, aku muli ŋga vetâña ŋinde ma io kanaŋo sakamao, aku kinzi tamâta ŋinde ma sipayaula ndo. Aŋga tamâta ea kinzi uru tininzi mwasa pa vetâña ara ndia Koroani Sapâña ilo papa, ande ŋinde itogo Koroani Sapâña io kanaŋo ara ndo lâ ilonzi kalonzi. Kanaŋo ara ŋinde nde via mao, ŋana ma simo vianzi mine ku simo nâ. <sup>9</sup>Mine kala kinda ma takai wulitia ŋana taveta vetâña ara kâ ndimo. Ambo kinda ma tamandi kaika ŋana taveta vetâña ara kâ, ande muli, lâ zo ndia Maro Kindeni ipatea lâ, ande kinda ma takai vetâña ara ŋinde ne kulu, itogo takai kâpwa lâ tâno ilo mine.

<sup>10</sup>Mine kala lâ zo ndia kinda takura tu taveta vetâña ara pinde panzi tininda pinde, ande ara ŋana ma taveta mine nâ. Ambo kinda ma taveta vetâña ara mine panzi ninda-nambwe kalo-tawana tamâta, ande ŋinde ma ara ndo.

**Paulo indeka ŋana Kirisi ne mateŋa lâ kâi popole tini**

<sup>11</sup>Kala ŋine naŋa Paulo warakâŋgu mbaunŋu aŋgere ŋgua ŋaina lâ pepa tini imâ pami. Aku miki kamora nanenŋu ŋgereŋa mâsi ŋine ipâŋga ŋalae.

<sup>12</sup>Miki kaloŋo ŋga. Kalo-tawana tamâta laŋeŋa pinde ilonzi tu ma simo tamâta ara ndo lâ Juda tamâta ŋalaŋala naonzi. Mine kala kinzi uru siporo ŋgua kaika pami tu miki ma kakai karae-veŋa ne mâsi lâ tinimi. Kinzi nenzi vetâŋa ŋinde ne duvi nde mine; ambo kinzi ma situla ŋgua tu, “Yesu ne mateŋa lâ kâi popole tini iveta kinda tapâŋga tamâta sondo lâ Maro Kindeni nao”, ande kinzi Juda tamâta ŋalaŋala ma sikai kazâŋa panzi. Aku tininzi pwâka tu kazâŋa mine ma ipâŋga panzi. <sup>13</sup>Kinzi kalo-tawana tamâta laŋeŋa ŋinde warakanzi ŋandai sipaveta sondo kuku Juda nenzi ŋgua tukuŋa ŋga, andeta ilonzi tu miki ma kakai karae-veŋa ne mâsi lâ tinimi. Ambo miki ma kaveta mine, ande kinzi ma sikura ŋana sipasuka warakanzi tininzi.

<sup>14</sup>Naŋa naŋa ma apandekâna warakâŋgu, ande tia, aku ma apanea tamâta toŋge wa vetâŋa toŋge, ande tia ndo. Naŋa ma andekana ku apanea nenda Maro Yesu Kirisi simbo nâ ŋana i ne mateŋa lâ kâi popole tini. Naŋa kaloŋgu tawana i, aku ŋana duvi ŋinde kâ apu muliŋgu pa tâno ŋine ne ilo-kalo wa vetâŋa marumbu lâ, aku tâno ŋine ne kelekele ikura tu ilele iloŋgu kaloŋgu kilo, ande tia. <sup>15</sup>Ambo tamâta toŋge ma ikai karae-veŋa ne mâsi lâ tini tâku tia tâku, ande ŋine nde kelekele kaa nâ. Taitu miki kaloŋo ŋga; ambo Maro Kindeni ma ilele tamâta toŋge ilo kalo, kala ipâŋga itogo tamâta wasaseki ndo, ande vetâŋa mine nâ nde kelekele mao.

<sup>16</sup>Maro Kindeni ne kalo-sukâŋa tava ne wisi-pisi imo kunzi tamâta ea sipono muli pa nanenŋu ŋgua ŋine. Kinzi tamâta ŋinde nde simo Maro Kindeni ne ŋgu mao.

<sup>17</sup>Naŋa tiniŋgu pwâka ndo tu tamâta toŋge ma malia ilua naŋa kilo. Tamâta pinde muŋga sikai kazâŋa pa naŋa, ande kala nzimba nia kie-kie nde ikeno tiniŋgu. Aku nzimba nia ŋinde itula pwataki tu naŋa amo Yesu ne wurâta tamâta mao.

<sup>18</sup>Niŋgu-nambwe wukale, nenda Maro Ŋjalae Yesu Kirisi ne wisi-wisi imo kuku miki râŋani. Mao.